



Arkivnr: 2014/19767-2  
Saksbehandlar: Britt Karen Spjeld

## Saksframlegg

### Saksgang

Utval	Saknr.	Møtedato
Kultur- og ressursutvalet		16.09.2014

## Innspel til ny stortingsmelding om friluftsliv frå Hordaland

### Samandrag

I brev av 4. juni 2014 inviterer Klima- og miljødepartementet til å gje innspel til tema i ein ny stortingsmelding om friluftsliv innan 19. september 2014. Gjeldande stortingsmelding om friluftsliv er St.meld. nr. 39 (2000-2001) Friluftsliv – ein veg til høgare livskvalitet.

Det overordna målet for den nye meldinga er å realisere meir av friluftslivet sitt folkehelsepotensial ved at fleire av befolkninga utøver friluftsliv på jamleg og varig basis. Eit viktig mål er også å bevare og utvikle friluftsliv som ein viktig del av den norske kulturarven og nasjonale identitet, og å få fram friluftslivet sin eigenverdi. Meldinga vil vere særleg retta mot friluftsliv i nærmiljøet, men vil også omhandle friluftsliv utanfor byar og tettstader. Den nye stortingsmeldinga om friluftsliv er planlagt lagt fram 1. halvår 2016.

Innspel frå Hordaland fylkeskommune baserer seg på gjeldande fylkesdelplan fysisk aktivitet, idrett og friluftsliv (2008-2012), høyringsforslag til regional kulturplan 2015-2025, innspel frå kommunar og organisasjonar og brev sendt 11. mai 2012 til Miljødepartementet frå styret i Vestkystparken med oppmoding om utarbeiding av ny stortingsmelding om friluftsliv.

### Forslag til innstilling/vedtak/avgjerd

Kultur- og ressursutvalet gir følgjande innspel til ein ny stortingsmelding om friluftsliv:

1. Den nye stortingsmeldinga om friluftsliv bør utarbeidast i tett samhandling mellom fleire departement slik at ulike perspektiv ved friluftsliv, m.a. arealplanlegging, kultur og idrett, funksjonelle gang og sykkelveggar, helse og omsorg, reiseliv og næring, miljø og naturmangfald, og opplæring for barnehagar og skule, vert ivareteke og konkretisert i ein forpliktande handlingsplan. Meldingsarbeidet bør m.a. samordnas med Meld.St.26 (2011-2012) Den norske idrettsmodellen (der friluftsliv har eit eige kapittel) og den nye folkehelsemeldinga som er under utarbeiding.
2. Mål og tiltak i Nasjonal strategi for eit aktivt friluftsliv og Nasjonal handlingsplan for sikring og tilrettelegging av friluftsområder (2013 – 2023) bør setjast inn i ein heilskapleg politikk som synleggjer statens vegval og verkemiddelbruk for friluftslivsfeltet dei komande 10-15 åra. Prosjekt som eit tidsavgrensa og nyskapande reiskap må vurderast i høve til utfordringar knytt til vidareføring, forankring og føreseielege driftsrammer.
3. Nasjonal handlingsplan for sikring og tilrettelegging av friluftsområder (2013 – 2023) har fokus på å sikre nye friluftslivsområde i nærmiljøet. Dette gir ein kraftig auka kostnad ved kjøp. Krava til auka tilgjengelegheit og universell utforming i tillegg til klimautfordringar med villare vær, gjer at kostnadane ved fundering og vedlikehald av friluftsområder med t.d. turløyper og kaiar vert betydeleg

- dyrare. Meldinga bør drøfte korleis statlege bidrag til sikring kan verte følgd opp med midlar til å opparbeide og drifte områda.
4. Allemannsretten og friluftsløva er grunnleggjande føresetnader for friluftslivet. Oppleving av stillheit og fridom i sameksistens med naturen er viktig for bruk og forståing for å ta vare på den. Motorferdsel i utmark og på sjøen bør regulerast for å sikre friluftskvalitet for alle. Meldinga bør seie noko om kor mykje urørt natur vi skal ha og korleis ein skal sikre eit naturmangfald. Naturområder som treng vern bør identifiserast. Miljøskader ved maritim forsøpling er ei omfattande og kostbar utfordring som meldinga må omtale.
  5. Klimautfordringar og berekraftig livsstil tilseier sterkare fokus på tilrettelegging for friluftsliv og reiseliv i nærmiljøet. Det er viktig at friluftsområder vert knytt til bustadområder med gang og sykkelveggar og offentleg transport.
  6. Frivilligheit og lokal kompetanse innan friluftslivet er eit viktig grunnlag for å kunne skape eit godt friluftsliv i samspel med det offentlege og private aktørar. Det er viktig at dei frivillige organisasjonane har gode levekår med stabile økonomiske rammer for å kunne inkludere enno fleire frivillige i sitt arbeid. Graden av deltaking i frivillige organisasjonar er prega av sosial ulikskap. Befolkningsgrupper med låg inntekt, trygda og etniske minoritetar deltek minst. Frivillige organisasjonar kan vere ein god arena for integrering.
  7. Hordaland fylkeskommune er positive til at det vert sett fokus på korleis staten kan bidra til at dei som er lite fysisk aktive kan bli meir aktive gjennom friluftsliv. M.a. er det fleire nye landsmenn som må få tilrettelagt informasjon og opplæring slik at dei kan ta del i friluftslivet.
  8. Det er positivt at friluftslivet sin plass i barnehagar og skular vert drøfta i den nye meldinga. Det trengs nye verkemidlar og auka innsats for at alle barn og unge skal få opplæring i og tilbod om friluftslivsaktivitetar.
  9. Ungdom bør få større høve til involvering ved planlegging av friluftsanlegg. Slik kan ein utarbeide eit variert og attraktivt aktivitetstilbod for ungdom.
  10. Auka fokus på utnytting av sjø og vatn til friluftslivsformål er viktig, m.a. ved å legge tilhøva betre til rette for bading, fiske og padlarar både i kajakk og kano. Aktivitetar på vatn er svært positivt for barn og ungdom der dei blir vant til å vere på og i sjøen, og kan auka symjedugleik for å motverke ulukker.
  11. Sykkel har i liten grad vore knytt til friluftsliv. Bruken av sykkel, både som transport til og frå friluftslivsområder, i friluftslivsområder og som ein friluftslivsaktivitet er aukande og bør omtalast i den nye stortingsmeldinga om friluftsliv både når det gjeld aktivitet og infrastruktur.
  12. Det er behov for auka kunnskap om kva områder som er viktige for friluftsliv. Arbeid med kartlegging og verdisetting av friluftsområder er avgjerande for god planlegging og bør ha forankring i meldinga. Regionalt samarbeid om friluftsliv er viktig for å ivareta heilskapen i felles friluftsverdiar. Ved FoU og anna informasjonsinnhenting vert kunnskapsgrunnlaget knytt til bruken av friluftslivsområder og bruksformer styrka.

Rune Haugsdal  
fylkesrådmann

Anna Elisa Tryti  
fylkesdirektør kultur og idrett

*Saksframlegget er godkjent elektronisk og har derfor inga underskrift.*

Vedlegg

- 1 Ny stortingsmelding om friluftsliv - informasjon om arbeidet og invitasjon til å gi forslag til temaer i meldingen
- 2 Oppmodning om utarbeiding av ny stortingsmelding om friluftsliv